

## 開放文學 – 歷代筆記 – 夷堅甲志 卷第九

鄒益夢 鄒益者·饒州樂平人·為進士·初興三舍時·乞夢於州城隍廟·夜夢往官府·見壁間詩一聯雲·鄒益若為饒解首·朱元天下第三人·既覺大喜·謂必冠鄉舉·時舍法初行·挾書假手之法甚嚴·益首犯·○朱元者·徽州人·蔡京改茶法·元為茶商·坐私販抵罪·正第三人云·

王李二醫

李醫者·忘其名·撫州人·醫道大行·十年間·致家貲巨萬·崇仁縣富民病·邀李治之·約以錢五百萬為謝·李○療旬日·不少差·乃求去·使別呼醫·且曰·他醫不宜用·獨王生可耳·時王李名相甲乙·皆良醫也·病者家亦以李久留不效·許其辭·李留數藥而去·歸未半·道逢王醫·王詢李所往·告之故·王曰·兄猶不能治·吾伎出兄下遠甚·今往無益·不如俱歸·李曰·不然·吾得其脈甚精·處藥甚當·然不能成功者·自度運窮·不當得謝錢耳·故告辭·君但一往·吾所用藥·悉與君·以此治之·必愈·王素敬李·如其戒·既見病者·盡用李藥·微易湯·使次第以進·閱三日有瘳·富家大喜·如約謝遣之·王歸郡·盛具享李生·曰·崇仁之役·某略無功·皆兄之教·謝錢不敢獨擅·今進其半為兄壽·李力辭·曰·吾不應得此·故主人病不癒·今之所以愈·君力也·吾何功·君治疾而吾受謝·必不可·王不能強·他日以餉遺為名·致物幾千緡·李始受之·二醫本出庸人·而服義重取予如此·士大夫或有所不若也·今相去數十年·臨川人猶喜道其事·

花果異

紹興二十一年四月·池州建德縣定林寺·桑樹生李·栗樹生桃·極甘美異常·鄱陽石門民張二公僕家·竹籬上生重台牡丹一枝甚大·吾家田人汪二十一家·鑊內現金色蓮花·有僧立其上·自四月八日至十日不退·其家以煮犬遂滅·聞自彭澤至石門民家·鑊多生花·但無僧·此異所未聞也·是年雨澤及時·鄉老以為大有年之祥·

黃履中禱子

黃鉞·字元受·建昌人·汪應辰榜登科·言其祖履中無子·禱於君山廟·夢人以彩籠盛五色鳳三·別以筠籠盛一鳥·並授之·後正室生三子·皆擢第·妾生一子·無所能·

絢紡三夢

絢紡·字公素·元姓句·犯上嫌名·遂增係為絢·其音如章句之句·宣和甲辰·赴省試·夢人告曰·遽得逢州便得紡·喜謂遽得者即得也·已而不利·至建炎戊申試維揚·夢如初·紡曰·遽者絢也·我已姓絢·又試於揚州·其必得·又不利·久之復夢其人來·以實告曰·君年四十八方登科·今未也·紡時三十八矣·度猶有十年·以未可得·不敢萌進取意·屏居道州·富家翁召教其子·及紹興甲寅科詔下·紡四十五歲矣·以為必無成·不肯往·主人強之曰·所以延君者·正欲挾小兒俱入舉場·君必行·陰令其子自為下家狀求試·紡不得已從之·遂與富子俱薦送·明年·繳公據納禮部·漫啟視則所具年甲誤以為四十七·是年正四十八也·默喜以為神助·獨未曉逢州便得之語·及坐圖混榜出·紡名之左一人姓馮·右一人姓周·是歲遂登第·首尾十二年·凡三見夢方驗·曲折明白如此·

黃司業夢

元符戊寅歲·睦州建德人黃司業者·失其四歲男子·日夜悲泣·夢之曰·兒已受生·無用相憶·兒前生嘗為宰相·坐誣陷善人·謫為公家子·隅又有小過·復再謫·今只在數里間方十四秀才家·他日當有官·畢此一世·後卻生佳處矣·明日訪方秀才·果得子·以十二月一日生·正與黃氏子亡日同·黃請觀之·兒躍然甚喜·與之物·即舉手如欲取狀·黃歸·遂不復哭·十四秀才者·名逸·官至朝請郎·所生子名序·紹興十二年登科·然仕才至常山丞以死·壽五十有三·右三事皆餘執度丈特言·

俞翁相人

郡武俞翁者·善相人·尤能聽器物聲·驗吉凶·先世仕南唐·為太史令·後主歸朝·俞氏舉族來居邵武之泰寧·翁年既高·人尊之呼為翁雲·葉祖洽兒童時·好騎羊為戲·翁見之曰·郎君當魁天下士·勉之無戲·祖洽遂折節讀書·會黃右丞履丁內艱鄉居·祖洽與邑子上官·均執弟子禮·師事之·嘗過小山寺遇翁·翁逆謂曰·狀元榜眼·何自來此·二人相視而笑·曰·寧有是·翁曰·不特爾·又同年焉·吾為子選一題·可預為之備·二人未之信·戲曰·題目謂何·翁指庭下竹一束·曰·當作此·二人笑而去·熙寧三年·廷試進士·罷詩賦論三題·易以策問·祖洽遂首選·均次之·方悟竹一束·蓋策字也·祖洽父恪少不學·嘗過翁門·縣之士子群集·無一可翁意·獨指恪曰·此人年六十·當官七品·服銀緋·眾皆無然·恪後以子貴·封累朝請郎·賜朱紱·正年六十雲·翁嘗行田間·聞水聲·曰·水流悲·田將易主·已而果然·又嘗入市聞樂聲·曰·金聲亢·其有兵·當在申酉間·然我無傷·兵四人當溺死·至期·果有戍卒自汀州還·過市群飲·爭倡女·抽戈相戕·度不自安·乘暮亂流而渡·正春濤怒漲·溺死果四人·或問其故·曰·日在子·又屬水·水旺於子·金至此死焉·其巧發奇中類是·今邵武人猶傳其相書一編·然去翁遠矣·

宗本遇異人

僧宗本者·邵武田家子·宣和元年·因餉田·行山峽中·遇道人·麻衣椎髻巧食·本曰·吾父未哺餐·可同至家取食否·道人怒·唾左拇端·抽一劍齶之·本對如初·道人笑曰·獠子可教·解衣帶小瓢·傾紅藥三顆授之·本舉掌欲服間·其二墜地不可得·但咽其一·道人復笑曰·分止此耳·忽不見·本不復歸家·入進村雙林院·止佛殿上·即能談僧徒隱事·咸驚異·走告其家·妻子來視·斥去不使人·明日歡傳一鄉·來詢休咎者·條道不絕·郡將以下·咸遣書乞頌·本握筆瞑目·頌立成·筆法清勁可愛·寺僧指為生佛·欲令久居·以壯聲勢·本曰·吾緣不在是·當往汀州·謁定光佛·奮臂便行·至泰寧之豐岩·樂其山水秀邃·亦夢紫衣金章人挽留·遂止不去·縣人共出錢為祝發·得廢丹霞院額·標其岩·未幾·羅崎疇老·自沙縣遣信招迎·欣然而往·時李伯紀丞相·自右史斥監邑徵·本與頌曰·青共立·米去皮·此時節·甚光輝·伯紀罔測·泊靖康初得君·驟拜執政·方悟其語·鄧肅志宏·以諸生見本·本指伯紀謂肅曰·君他日貴由此人·及伯紀登庸·志宏白衣至左正言·本留沙縣逾年·復還丹霞·建炎四年·伯紀自嶺外歸見本·本大書機上·作紹興二字·明年果改·元·語伯紀曰·茲地血腥觸人·當有兵起·公可居福州·從之·二月·環境盜起·邑落焚剽無餘·二年六月·伯紀帥長沙·過邵武·迂道訪本·本送至建寧·趣其速行·戒之如泰寧·復大書邑廳壁曰·東燒西燒·又連書七七數字·才出境·江西賊李敦仁·入邑縱火·正七月七日也·本初住丹霞·有飛雀立化於佛前香炉上·疇老為著瑞雀頌·人以為師所感雲·紹興十六年·豫言某日當去·至期無疾而化·本晚工詩·殖貨不已·尤恠齋·視出一錢如拔齒·其徒多諫之·曰·此吾宿業也·

惠吉異術

僧惠吉張氏·饒州餘乾人·少亡賴·為縣五伯·因追胥村社·少休山麓·遇婦人乘竹輿·無所服·惟用匹布蔽體·訝其詔秀而結束詭異·揖而訊之·曰·非汝所知也·取一卷書授之·曰·勉旃·後當為僧·言訖·輿去如飛·二僕夫冉冉履空中·張歸即能談人意間事·棄妻子出遊·過撫州宜黃縣·行止佯狂·人無知者·時大旱·縣人作土龍禱雨·張投牒請自祈禱·約明日午必雨·不爾願焚軀以謝·即跌坐積薪上·民之輕剽禍賊者·爭益薪·及明·烈日滋熾·萬眾族觀·至秉炬以須·如期·果大雨·四境沾足·邑人始謹事之·鄒柄居是邑·惡其惑眾·張往見之·曰·吾宿負公杖·幸少寬我·會張為邑人整治衢陌·哀金數百萬·或譖於鄒曰·彼乾沒其半·問道以遺妻孥·鄒怒言於縣宰·捕笞之·已而悔詣張謝·張曰·曩固言之矣·無傷也·宣和三年·適邵武泰寧·謂縣人黃溫甫曰·吾與若隔生同為五台僧·若嘗病·費吾藥餌·今當館我以償·黃為築庵香炉峰頂·買僧牒落髮·師能咒水起疾·數百

里間·來者絡繹·通直郎葉武為令·夢一女子持火東西焚庭廡·復薰鼓門·驚覺·遲明師造縣·迎問曰·昨夕無恐否·葉愕然·具以夢告·師命輿土地木胎·至庭斧之·血津津然·初縣有崇物·化為美姝·惑宿直吏·至是遂已·縣丞江定國母呂氏·有眩疾·每發·頭涔涔不可忍·以扣師·師曰·無它故·要是銀兒為孽·定國駭懼·銀兒者·其父時故姬·呂氏陰殺之·於是丐為禳謝·師引紙畫為禽畜百十種·令秉火炬·設瓜果·賓主置榻·戒其家人皆就寢勿顧·獨一二僕使在·迨夜·師入呂氏寢·物色之·得於妝合·僕者咸見好女子·年可十六七·緣衣黃裙·對之掩泣·若不從狀·師徐徐諭解·已而肯首·乃以所畫並楮錢付之·送使出門·呂氏明日疾不作·富人江景淵·嘗與人爭田不勝·用計殺之·忽得脾疾·詣師請水·師具數其過·景淵叩頭哀祈·為至其居·命斲地丈許·得蒼狗·呿牙怒視·左右皆恐·視之乃塊石·師以杖擊之·應手糜碎·景淵即愈·又有倡棄籍歸一胥·同謁師·師所居山椒·林樾蔽繞·來者未至門不知也·師逆告其徒曰·某人夫婦少選至·勿令其婢子入·及二人至·元無婢自隨·師言狀·倡驚泣求救·乃昔日曾逼一婢赴井死·胥固未之知·嘗入市·見搏掩者立道左·呼使前·捫其項下如揭物狀·曰·後不得復爾·人問故·蓋此人昨夕負博進·恚而投繯·救至得不死·師白晝捕魃魅·逆說禍福甚多·不勝載·紹興四年死·泰寧人至今繪事其像·不呼其名·惟曰張公·或曰張和尚雲·

#### 卓筆峰

泰寧縣東十五里·有仙棺石·相傳往年因風雨白晝晦冥·人聞空中音樂聲·及齊·見棺木在岩間·其處峭絕·人莫能上·疑仙人蛻骨送於此·因名音山·亦曰聖石·遇大旱·祈雨即應·蔣穎叔使福建日·過之為賦詩·更名卓筆峰·宣和五年·復大雷電·風雨雲塞·及霽而棺旁又列一棺·題湊不異世俗作者·次年春·山邊人見輿馬旌幢·騎從呵殿·騰雲至其地·作樂而去·樂聲冷然·非世間音·村民能搯援者·嘗登之·雲棺不施釘·可開視·骨色青碧·葬具悉古制·惟一小剪刀·細腰修刃·同人問用者·將挈而下·忽霹靂挾崖起·大蛇旁午·民驚怖墜地·體無所傷而病狂·半年方愈·為鄉人言如此·右五事·皆邵武士人文文譽言·

#### 張琦使臣夢

左武大夫榮州刺史張琦·紹興十六年·自建康解軍職·為江東兵鈐駐饒州·三年而病·琦有田在池州建德縣·命使臣掌之·是歲使臣夢黃衣數人·持一朱書漆牌·雲攝饒州鈐轄張琦·潭州長沙知縣趙伯某·既寤·意謂琦被召命·詣鄱陽慶之·琦病已篤·不得見·家人恐其夢不祥·不敢言·而琦數詢其子雲·趙知縣到未·子謂病中譫語·不敢對·凡月餘·果有趙君者·罷長沙縣歸·至饒泊城下·卒於舟中·琦登時亦死·

#### 周濱受易

周濱·字東老·福州閩人·佳士也·陳了翁以兄之女妻之·濱受易於翁·如有所悟·翁喜參禪·見濱論死生之說·禪者所不能言·甚訝之·宣和中以疾卒·前一日·作詩與蔡氏甥曰·三舅報無常·濱行第三諸甥腳手忙·熟捶三挺皂·爛煮一鍋湯·垢膩從君洗·形骸任爾扛·六釘聲寂寂·千古路茫茫·

#### 蔡振悟死三

蔡振·字子玉·閩縣人·年甫冠·從鄉先生鄭東卿學易·忽悟死生之理·其家在鼓山下·紹興十七年·聞莆田鄭樵·入山從老僧問禪·振作書抵樵·論儒釋之學·樵見其年少而論高·疑假手於人·親扣之·益奇怪·乃見東卿·問振所學·東卿曰·不知也·十九年四月·振來謁東卿·問尚書禹貢·得疾歸家遂篤·叱出其妻·呼弟掄告以死·令掄把筆·口占一詩·曰·俟同捨生來弔·可出示之·其語雲·生也非贅·死兮何缺·與時俱行·別是一般風月·詩畢而逝·

#### 許氏詩讖